



# Komisiyo y'Igihugu y'Uburenganzira bwa Muntu

B.P. 269 Kigali - Tél. : 34 30 / (+250) 788 30 48 78

Email : [info@cndp.org.rw](mailto:info@cndp.org.rw)

Website : <http://www.cndp.org.rw>

Twitter : [@HumanRightsRW](https://twitter.com/HumanRightsRW)

Facebook : [NCHR](https://www.facebook.com/NCHR)

## ITANGAZO RYA KOMISIYO Y'IGIHUGU Y'UBURENGANZIRA BWA MUNTU KU ITANGIZWA RY'ICYUMWERU CYAHARIWE UBURENGANZIRA BWA MUNTU, TARIKI YA 30 UGUSHYINGO 2021

Mu rwego rwo kwizihiza isabukuru ya 73 y'Itangazo Mpuzamahanga ry'Uburenganzira bwa Muntu iba ku wa 10 Ukuboza buri mwaka, Komisiyo y'Igihugu y'Uburenganzira bwa Muntu ifatanyije n'Ishami ry'Umuryango w'abibumbye ryita ku burenganzira bwa Muntu na zimwe mu Nzego za Leta hatangijwe icyumweru cyahariwe uburenganzira bwa Muntu kizarangira tariki 10 Ukuboza 2021.

Iki cyumweru giteganijwemo ibikorwa bitandukanye bizagaruka ku nsanganyamatsiko ku rwego rw'Isi igira iti: KURESHYA: **"Kugabanya ubusumbane, guteza imbere uburenganzira bwa Muntu"** (EQUALITY " **Reducing inequalities, advancing human rights**").

Ibyo bikorwa bigamije gukangurira abantu ibikubiye mu Itangazo Mpuzamahanga ry'uburenganzira bwa Muntu n'ibigomba gukorwa kugira ngo hirindwe ubusumbane mu burenganzira no mu cyubahiro n'ingaruka zabwo.

Mu kwizihiza iryo tangazo ku nshuro ya 73, Komisiyo yateguye ibiganiri bizahabwa abagize inama y'umutekano yaguye ku rwego rw'Intara zose bari kumwe n'abagize Komite ngishwanama zo kurwanya ruswa n'akarengane ku rwego rw'uturere ndetse na Komite z'urubuyiruko rw'abakorerabushake ku rwego rw'Imirenge y'Umujyi wa Kigali bibakangurira ibikubiye mu itangazazo mpuzamahanga ry'uburenganzira bwa Muntu mu kurwanya ubusumbane mu burenganzira no mu cyubahiro; gutanga ubutumwa buzanyuzwa kuri Radio na Televiziyo ku ruhare rw'inzego mu kurwanya ubusumbane no guteza imbere uburenganzira bwa Muntu.


Itangazamakuru rirasabwa gukomeza kuba umuyoboro mwiza wo gusakaza ibikorwa bizaba mu cyumweru cyahariwe uburenganzira bwa Muntu, ribigeza ku baturage kandi ribakangurira gukomeza kubahiriza uburenganzira bwa buri wese. Rirasabwa kandi gusakaza ibikubiye mu Itangazo Mpuzamahanga ry'Uburenganzira bwa Muntu kugira ngo abantu barusheho kubimenya no kubyubahiriza.

Inzego zitandukanye, cyane izegereye abaturage, zirasabwa kubahiriza inshingano zo kurinda uburenganzira bwa buri wese kandi zikihatira kurwanya ubusumbane ubwo ari bwo bwose muri serivisi zitanga, kugira ngo uburenganzira bwa Muntu bukomeze butere imbere.

Abaturarwanda barasabwa kugira uruhare mu kurinda no guteza imbere uburenganzira bwa Muntu harimo kugaragariza inzego zibishinzwe aho bwahutajwe, kandi bakuzuza inshingano zabo.

**Bikorewe i Kigali, ku wa 30 Ugushyingo 2021**

**MUKASINE Marie Claire**



**Perezida wa Komisiyo y'Igihugu y'Uburenganzira bwa Muntu**